



education

Department:
Education
REPUBLIC OF SOUTH AFRICA

**NATIONAL
SENIOR CERTIFICATE**

LIBANGA 12

SISWATI LULWIMI LWASEKHAYA (HL)

LIPHEPHA LESIBILI (P2)

LWETI 2009

EMAMAKI: 80

SIKHATSI: 2½ ema-awa

Leliphepha linemakhasi langema-18.

TICONDZISO

1. Fundza lelikhasi ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lelilandzelako bese ubeka luphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimphawu kuphela bese ukhetsa leyo lofuna kuphendvula yona.
3. Liphepha lemibuto licuketse tigaba LETINTSATFU:

SIGABA A: Tinkondlo (30)
SIGABA B: Inoveli (25)
SIGABA C: Umdlalo (25)
4. Landzela ticondziso ekucaleni kwaleso naleso sigaba.
5. ISIHLANU IMIBUTO lofanele uyiphendvule seyiyonkhe: ESIGABENI A imibuto mitsatfu (3), ESIGABENI B munye (1), ESIGABENI C munye (1). Sebentisa luhlu lwekutikhumbuta kute usitakale.
6. Tinombolo tetimphendvulo atihambisane naleto temibuto njengobe tinjalo ephepheni lemibuto.
7. Cala lesa naleso sigaba ekhasini LELISHA.
8. Bhala ngesandla lesibonakalako nalesifundzekako.
9. Siphakamiso sekulawulwa kwesikhatsi:

SIGABA A: Lokungenani emaminitsi langema-40
SIGABA B: Lokungenani emaminitsi langema-55
SIGABA C: Lokungenani emaminitsi langema-55

LUHLA LWEKUTIKHUMBUTA:

Lelikhasi litawusita bahlolwa ekukhetseni imibuto LABAFUNA kuyiphendvula ngaphandle kwekufundza lonkhe leliphepha lemibuto.

SIGABA	TINOMBOLO TEMIBUTO	LINANI LEMIBUTO LEPHENDVULWAKO	THIKHA
A: Tinkondlo (Tinkondlo letifundvwe ekilasini)	1 – 4	2	
A: Tinkondlo (Inkondlo lengakafundvwa eklasini)	5 – 6	1	
B: INoveli (Indzabambhalo nobe imibuto lemifisha)	7 – 12	1	
C: Umdlalo (Indzabambhalo nobe imibuto lemifisha)	13 – 16	1	
CAPHELA: ESIGABENI B na C, phendvula YINYE INDZABAMBHALO NAMUNYE umbuto WEMIBUTO LEMIFISHA.			

SIGABA A: TINKONDLO**TINKONDLO LETIFUNDVWE EKILASINI**

Khetsa tinkondlo tibe timbili kuleti letilandzelako uphendvule ngato imibuto letawulandzela:

UMBUTO 1

Fundza lenkondlo lelandzelako bese uphendvula imibuto letawulandzela.

UMTAPO – CD Masilela

- 1 Gogo ngungu yesive,
- 2 Uyincwadzi lehamba ngetinyawo
- 3 Ungumtapo wetincwadzi emphilweni yetfu,
- 4 Emaphiko akho asifukamela sonkhe.
- 5 Kuwe angisuye umntwana wesihlahla,
- 6 Kuwe angisiwo umlanjwana, ngingumntwana wagogo.
- 7 Ngiyingati yakho ngingumntwanakho gogo.
- 8 Uyadvondvolotela kepha uludvondvolo lwetfu
- 9 Uyinsimu lesiyivuna sonkhe ngekukhululeka
- 10 Ulibhange letfu kantsi uyinkomati yetfu
- 11 Unjengesikolo kitsi, ungucedzasitunge.
- 12 Naloku ematsambo sekaphikisana nenhlitiyo,
- 13 Kepha inhlitiyo yakho inguphethiloli
- 14 Lokuvuselelako, unyatsele ngemandla
- 15 Siyabonga gogo loligugu
- 16 Umtapo loligugu etitukulwaneni!

Bhala indzatjana ngaloko sonkondlo lakhuluma ngako kulenkondlo lengenhla. Budze bemphendvulo yakho abube ngemagama langabi ngaphasi kweli-190 kodvwa kungabi ngetulu kwalangama-240.

[10]**NOBE****UMBUTO 2**

Fundza lenkondlo lelandzelako bese uphendvula imibuto letawulandzela:

KUHLE KETFU! – OA Bhiya

- 1 Kusemtsimbeni lomangalisako,
- 2 Kusemgidweni lowesabekako;
- 3 Baphekeleteli bamakoti banyukubele,
- 4 Buso betibukeli buncumile
- 5 Makoti ucambalele tfwi!

- 6 Lomshado uyangimangalisa!
 7 Umlobokati wembetse iveyili yelipulango,
 8 Umyeni wembetse letimnyama;
 9 Buso babo buphaphatsekile,
 10 Imiphefumulo yab' ikhatsatekile.
- 11 Talukati atililiteli,
 12 Emajah' awaphonseki,
 13 Tintfombi atigidz' ekudzeni,
 14 Bamunya tiffuph' emlonyeni,
 15 Kungabe bayawulala badleni?
 16 Iwil' insika yelikhaya.
- 17 Sicumbi setivakashi siyashuca,
 18 Libandla lebafundisi liyahuba;
 19 Bayolim'ensimini lengafulwa.
 20 Likhaba lalensimu liyababa;
 21 Likhaba lalensimu alibonwa.
- 22 Umbhishobh' ubusis' umlobokati,
 23 Umbhishobh' ubhek' emculwini;
 24 "Lutful' elutfulini' umphefumulo kumnikati"
 25 Liyakhemetel' etibukelini,
 26 Iyan' imvula yetinsizi;
 27 Umtsimba wonkh' uhluneme,
 28 Umlobokati usele weneme.

- 2.1 Kulesihloko salenkondlo sonkondlo ukhetse kusebentisa sibabato (!). Ase usho kutsi ngabe ukwenteleni loku? (1)
- 2.2 Shano luhlobo lwebunkondlo lolwakhiwa nguletinhlavu letibhalwe ngalokugcamile kulomusho wenkondlo lolandzelako:
Buso babo buphaphatsekile (1)
- 2.3 Ngulenjani leveyili yemapulango lakhuluma ngayo sonkondlo lapha emgceni 8? (1)
- 2.4 Ngemusho munye shano kutsi ngubani lomlobokati sonkondlo lakhuluma ngaye kulenkondlo. (1)
- 2.5 Lapha enkondlweni sonkondlo usebentise sihabiso lesitsi "Iyan' imvula yetinsizi". Ngani?
 Ngabe loku ukusebentise ngemphumelelo yini? (2)
- 2.6 Kukhona yini kubumbana kwaleligama lelitsi umtsimba kanye nalenkondlo yonkhe? Hluta. (2)
- 2.7 Sihloko salenkondlo lesitsi Kuhle Ketfu ngabe siyahambisana yini nalokushiwo yinkondlo? Chaza. (2)

[10]**NOBE**

UMBUTO 3**Fundza lenkondlo lelandzelako bese uphendvula imibuto letawulandzela:****BENGIKUTSANDZA SIBONGILE – ESN Mathunjwa**

- 1 Akusingimi lengadala lutsandvo,
- 2 Akusingimi lengatsi lababil' abahlangane;
- 3 NguSimakadze e-Edeni mandvulo,
- 4 Ngitibone ngikulensimu yasendvulo;
- 5 Ngehluleka kuyilima.

- 6 Ngifikelwa butfongo ngilale,
- 7 Bubuye bungibalekele ngicabange ngawe,
- 8 Tehle ngigubetelwe ngulelimnyama;
- 9 Anginalo likhambi lekulisusa,
- 10 Ngabe belilekuphoca lutsandvo?

- 11 Bakini bats' unguSibongile,
- 12 Babonga kuvela kwentfombi lenhle;
- 13 Pho! Mine ngeke ngibonge lokuhle!
- 14 Kunekube ngilicalekise
- 15 Lilanga lesatana ngalo sobabili?

- 16 Kutsiwa ngisemncane,
- 17 Kutsiwa ngisemncane ngingafuni,
- 18 Ngincumile, ngincumile
- 19 Mine emuva angibuyeli,
- 20 Sengiyesaba angisenakuteka.
- 21 Kulokuncane kufundvwa lokukhulu,
- 22 Pho ngibuye ngitibopheleni?
- 23 Sani setsembiso lengingasenta nemunfu?
- 24 Esitibeni setingwenya ngitiphonselani?
- 25 Ngitishelalis' esiweni ngibuka?

3.1 Bhala bunkondlo lobakhiwa ngulamagama ladvwetjelwe kulemisho lelandzelako:

Babonga kuvela kwentfombi lenhle;
Pho! Mine ngeke **ngibonge** lokuhle! (1)

3.2 Etinkondlweni lotifundzile wena ubona kutsi lenkondlo iluhlobo luni? (1)

3.3 Caphuma imphindza sonkondlo layisebentisile estandzeni 4 kulenkondlo lengenhla. (1)

3.4 Shano luhlobo lwebunkondlo loluvelwa ngulemigca lemibili yenkondlo.

Kunekube ngilicalekise
Lilanga lesatana ngalo sobabili? (1)

3.5 Sonkondlo bekakusiphi simo nakabhala lenkondlo? Ngani? (2)

3.6 Ngabe kukhona yini kubumbana kulemigca lelandzelako nenkondlo?

**Akusingimi lengatsi lababil' abahlangane;
NguSimakadze e-Edeni mandvulo.** (2)

3.7 Wena ucababanga kutsi sonkondlo uwusebentiselani lomusho wenkondlo lolandzelako?

Tehle ngigubetelwe ngulelimnyama. (2)
[10]

NOBE

UMBUTO 4

Fundza lenkondlo lelandzelako bese uphendvula imibuto letawulandzela:

MKHULU – OA Bhiya

- 1 Lelifusi lelibhalash' enhloko liyakhuluma,
- 2 Liyangichweba kutewutsekela lwati.
- 3 Letihlatsi letimashwayi tiyachasisa,
- 4 Loludvondvolo lokhokhotela ngalo
- 5 Lubufakazi ngumhawu nangikubuka,
- 6 Ngifikelwa ngumunyu nangikubuka.
- 7 Ngiyabesaba butfongo lobukunyonyobelako!
- 8 Ungalal' ungakangihlatiyeli lenkanankana:
- 9 Uph' umhelwane kumasungukati?
- 10 Tiphi tidvwaba kubalobokati?
- 11 Aph' emajobo emajaheni?
- 12 Tiphi tingej' etintfombini?
- 13 Ngitjele mkhulu nawe gogo.
- 14 Bhek' emphumalanga usinge mkhulu
- 15 KweMphumalanga kudliwe kweNshonalanga.
- 16 Ubonan' emshini wenkhosatana?
- 17 Kungan' ubalisa ungacedzi mkhulu?
- 18 Utakuphiselwa ngubani namihl' ingodvwane?
- 19 Ungek' usayosebent' eNgodvwane,
- 20 Imvelo nengodvwane sekwabate.
- 21 Naku kuhlwa kukusondzelela,
- 22 Nali lisela likunyonyobela,
- 23 Nangu monase akucatsamela
- 24 Kulesosicel' uphunga timphungane;
- 25 Maye ngamkhulu wami ...!
- 26 Lafiphala lilanga lami,
- 27 Lala kancane mkhulu wami!

- 4.1 Caphuna imigca kulenkondlo lengenhla lapho sonkondlo asebentise khona invumelwanosicalo endzimeni yekugcina. (1)
- 4.2 Hlobo luni lwesifanamsindvo loluvelwa nguletinhlavu letehlukile kulomugca wenkondlo lolandzelako?
Lafiphala lilanga lami (1)
- 4.3 Bunkondlo buni lobuvelwa ngulomugca wenkondlo lolandzelako? Usho ngani?
"Ngiyabesaba butfongo lobukunyonyobelako!" (2)
- 4.4 Yini lebangela sonkondlo atsi naku kuhlwa sekusondzela nakakhuluma ngalona lekukhulunywa ngaye kulenkondlo? Sekela imphendvulo yakho. (2)
- 4.5 Lona lokukhulunywa ngaye kulenkondlo uluphawu lwani emmangweni? Bhala kube kubili. (2)
- 4.6 Mkhulu uligugu lesive. Bhala kube kubili ummango lekufanele wentele bantfu labafana naye. (2)

[10]**NA****TINKONDLO LETINGAKAFUNDVWA EKILASINI****UMBUTO 5****Phendvula munye umbuto kulena lelandzelako:****MAGAGABULA – MP Mavuso**

- 1 Magagabula ...
- 2 Gcwi gcwi enkhundleni,
- 3 Gcwi gcwi Magcwigcwi,
- 4 Dluku dluku umtinjana,
- 5 Ntjikitisiyane lukhadlwana,
- 6 Viyo viyo tinkhwela.
- 7 Emsakatweni nguwe
- 8 Kumabonakudze nguwe,
- 9 Emgcobanyawo ukhona,
- 10 Kushis' emateki,
- 11 Kuvulek' imitfombo,
- 12 Imitfombo yemjuluko.
- 13 Awuhlabel' uyahlabela,
- 14 Livi ligolide,
- 15 Ngalo nje-
- 16 Mbo mbo emanceba,
- 17 Ntininini situnge,
- 18 Tihlatsi netindlebe-
- 19 Ematse nelulwimi.

- 20 Wasanganisa live lakhamisa,
- 21 Brenda ufutfunyetwa yini?
- 22 Nang' ayabatseka bo!
- 23 Udl' imphuphu lenebutsi,
- 24 Maye umubi *Cocaine*
- 25 Ngekuvusa phas' emachawe etfu.

Bhala indzatjana ngaloko sonkondlo lakhuluma ngako kulenkondlo lengenhla. Budze bemphendvulo yakho abube ngemagama langabi ngaphasi kweli-190 kodvwa kungabi ngetulu kwalangama-240.

[10]

NOBE**UMBUTO 6**

Fundza lenkondlo lelandzelako bese uphendvula imibuto letawulandzela:

MABASA – RT Maseko

- 1 Nyanga yaMabasa,
- 2 Ubusisiwe kuleNingizimu Afrika,
- 3 Ngekulets' inkhululeko yema-Afrika,
- 4 Lefike yafana neliphupho
- 5 Kwajabula labancane nalabadzala,
- 6 Kwajabula ngisho nalabalala
- 7 Kuw' emadliza emilandvo.
- 8 Ufike tingemashumi lamabili
- 9 Leve ngaletiyinkhotsa,
- 10 Wabasa wena Mabasa,
- 11 Wabasa umlilo lonemandla
- 12 Longenawucima nanini,
- 13 Kufika kwakho kwenanelwe
- 14 Bantfwana ngencatfo nengcabhayi,
- 15 Bomake ngemichuchumbelo netihlabelo,
- 16 Bobabe ngesibhaca nekuhaya.
- 17 Ufike kuwo wenkhulungwane
- 18 Lenemakhulu lasishiyagalolunye nane,
- 19 Wafika libalele nebukhweni betinja,
- 20 Wabas' imbutfuma yebunye
- 21 Leyawuhlanganis' i-Afrika yema-Afrika,
- 22 Inhlangan' ibe yembokodvo yaMagayela.
- 23 Nyanga yemilandvolandvo,
- 24 Ukwentile lokukhulu nalokubabatekako,
- 25 Wakuletsa kukhanya kuleNingizimu Afrika,
- 26 Kwenanelwa ngemisindvo yentfokoto
- 27 Libuyele lelatsatfwa ngebutulujane,
- 28 Libuyele kubanikati balo,
- 29 Ngete libuye lihambe,
- 30 Liyawunakekelwa njengelicandza
- 31 Ligadvwe njengelizini.

- 6.1 Bunkondlo buni lesibutfole kulomugca lolandzelako?
"Kufika kwakho kwenanelwe" (1)
- 6.2 Nguluphi luhlobo lwemfanekisomcondvo lolutfolakala kulomugca lolandzelako.
"Kwajabula labancane nalabadzala" (1)
- 6.3 Kunemfanekiso mcondvo lomayelana nenhlonipho lotfolakala esitandzeni sekucala. Wubhale. (1)
- 6.4 Lesihloko salenkondlo lesitsi Mabasa sinamlandvo muni emmangweni waseNingizimu Afrika. Chaza. (3)
- 6.5 Mlayeto muni lomumetfwe ngulomugca longentasi?
"Wabas' imbutfuma yebunye" (2)
- 6.6 Bunkondlo buni lobumumetfwe ngulamagama ladvwetjelwe kulenkondlo? Sekela.
"Wabasa wena **Mabasa**,
Wabasa umlilo lonemandla" (2)
[10]

SAMBA SIGABA A: 30

SIGABA B: INOVELI

Kulesigaba kunemanoveli lamabili. Wena-ke khetsa ibe yinye loyifundze ekilasini lonyaka uphendvule ngayo:

CAPHELA

Khetsa emkhatsini WENDZABAMBHALO NEMIBUTO LEMIFISHA kuleyo naleyo noveli loyifundzile. Kumele uphendvule nobe ngumuphi umbuto ube MUNYE *ngaleyo noveli loyifundzile*. Uma ukhetsa kuphendvula umbuto wendzabambhalo kulesi sigaba, uphocenelekile kutsi ESIGABENI C uphendvule imibuto lemifisha.

UMBUTO 7**LIPHUME NEBOVU – BB Malangwane**

Kutfufuka kwalenzaba kweyeme kubalingisi labakhona endzabeni. Sekela lombono ngekubhekisa kulabalingisi labalandzelako.

Lushawulo
LaMagagula
Tintfombi

Indzabambhalo ayibe nemagama langabi ngaphasi kwema-340 kodvwa angabi ngetulu kwalangema-390.

[25]**NOBE****UMBUTO 8 (IMIBUTO LEMIFISHA)****LIPHUME NEBOVU – BB Malangwane**

8.1 Fundza lethekesthi leyincenye yenzaba bese uphendvula imibuto letawulandzela:

Abetsi lapho acabanga kutsi kungenteka kutsi unina ufile, titsi hushu. Nekusa kuyephuta nangabe kukhona lapho ajake khona. Kwasa abuka ngewayitolo. Kusa kwatiwa nguye. Wake wema noko entela kutsi uyise aphume ahambe aye emsebenzini. Watsi kube ayibone imoto ishona elukhalweni washaya sikhiya emnyango. Wayingenela indlela asacondze esibhedlela kaHayindi. Uhamba nje nendlela akayiboni kahle ngenca yetinyembeti letatigcwele emehlweni akhe. Abetsi lapho ahlanguka nebantfu avele abancishe emehlo. Engcondvweni yakhe kwakume umbuto munye kutsi uma unina asafile yena angabatsini labantfwana. Watsi nakefika esibhedlela kwaba lula kuye ngobe nemaphoyisa acabanga kutsi uyagula kantsi uphetfwe tinhlupheko takhe. Phela tivakashi atikavunyelwa kungena ekuseni. Watsi angena nje watitsela etikwalomunye umongi labebafundza naye.

"Kunjani mngani, sewute kumake?" kusho umongi lowo. Lamagama alomongi aphendvula yonkhe imibuto leyayiloku iphambana enhloko yaKhetsile.

"Ngaba nenhlanhla ngahlangana nawe, ingabe yena make unjani?"
 "Cha, kusete umehluko, kodvwa sitawuva kutsi dokotela utsini nakefika lamuhla. Nangabe kunjani vele utakugcina ahlindziwe." Lelo lametfusa Khetsile. Noko umongi wachubeka wamlayela ligumbi lalele kulo unina. Watsi angena nje wahluleka nekutsi sawubona kunina. Ingani phela tinyembeti tase tichuluka nje ngenca yekubona unina asamnyama ungatsi akasesuye lophilako. Nenina naye wadzabuka wakhala. Kwaba sikhashana bobabili bakhala kungekho lokhulumako, kwate kwatsatsa yene LaMagagula watsi: "Ubothantaza mntfwanami. Inkhosi nayivuma utawuphila. Kodvwa noma ngingaphila mine ngiyebuyela ekhaya ngigone tandla."

- 8.1.1 Kungani Khetsile acale ayekele uyise aphume aye emsebentini ngembi kwekutsi yena ayewubona unina esibhedlela? (2)
- 8.1.2 Humusha lenkhulumo letsi, **"noma ngingaphila mine ngiyawubuyela ekhaya ngigone tandla."** (2)
- 8.1.3 Bhala inkhulumo lecacisa inkholo yaLaMagagula kuletheksthi. (1)
- 8.1.4 Ngubani umlingisi lokholwekako emkhatsini waLaMagagula naTintfombi? Usho ngani? (2)
- 8.1.5 Similo saKhetsile siwufundzisani ummango? (2)
- 8.1.6 Similo saKhetsile siwufundzisani ummango? (1)
- 8.1.7 Kugula kwaLaMagagula kwasintjintja similo saLushawulo. Bhala emaphuzu lamabili lafakazela loko. (2)
- 8.1.8 Shano ingcikitsi yalenoveli bese uveta tehlakalo letimbili letiyesekelako. (3)

NA

- 8.2 Fundza futsi letheksthi leyincenye yendzaba bese uphendvula imibuto letawulandzela:

Lushawulo akazange nje atihluphe ngekucela emsebentini. Ekhaya bantfu bebaloku babuke elukhalweni bacabanga kutsi phela batambona achamuka, phindze kwaze kwafika lona lilanga lekutsi asale asafihlwa seloku angabonakali. Noma libhokisi kwakute, kodvwa bantfu benkhosi bavuka balimba lithuna. Bebati kutsi libhokisi utakuta nalo Lushawulo ngobe babembonile ebantfwaneni lababili baTintfombi eta nalo khona lena edolobheni. Ngekubona kuhamba kwelilanga, LaMagagula watfuma bantfwana kutsi kuhle bahambe bayewumela ibhasi lebuya kaManzini ngobe incenye kungabakhona lakuphatsisile Lushawulo.
 Batsi basalindzele ibhasi bantfwana, babona imoto yeyise ichamuka. Nabatsi batayibona ijika, phindze bayibona iphambuka ima eceleni yehlisa lisaka letinkhwa kanye nenyandza yemapulangwe.
 "Tsatsani lapha bafana ninike unyoko," washo ashaya sivalo ayishaya izula seyicondze eNgonini lapho ayewucupha khona bhanana wakhe.

- 8.2.1 Siphetfo salenzaba sibumbene kangakanani nesihloko salenzaba? (2)
- 8.2.2 Lushawulo uvetwa njengemlingisi lonelutsandvo lolubandlululako. Khokha inkhulumo lefakazela loku kuletheksthi. (1)
- 8.2.3 Chaza sibekandzaba senhlalo salenzaba. (2)
- 8.2.4 Hlola sento saLushawulo sekucosha unina nekwemukeleka kwaso emmangweni lesiphila kuwo? (2)
- 8.2.5 Bekuyini inhloso yembhali nakakhulumisa Lushawulo lamavi lalandzelako, "Tsatsani lapha bafana ninike unyoko." Chaza. (2)
- 8.2.6 Sabanjani siphetfo seligugu laLaHlophe ngamakoti wakhe lomusha Tintfombi? (1)
- [25]

NOBE**UMBUTO 9*****KUBAMBA LETINGELAKO – DE Nkosi***

Umbhali usivetele tinhlobo letehlukene tetifundvo kulenoveli. Bhala indzabambhalo lenemagama langabi ngaphasi kwema-340 kodvwa angabi ngetulu kwema-390 uvete wakho umbono ngaloku lokushiwo lapha ngenhla. [25]

NOBE**UMBUTO 10 (IMIBUTO LEMIFISHA)*****KUBAMBA LETINGELAKO – DE Nkosi***

- 10.1 Fundza leteksthi leyincenye yenzaba bese uphendvula imibuto letawulandzela:

"Nivumelani kutsi siphafwe ngumchamuki kutsiwe yimeya lenkhulu yetfu?" Kubuta Magumeni kuLaShongwe akhombisa kungeneliswa kuphatfwa nguMphikeleli.

"Ukhetfwe bantfu ngako-ke asinalo lilungelo lekuphikisana nevoti. Uma siphikisana naye kusho kutsi siphikisana nebantfu. Ungumsinsi wekutimilela kulenzwo, ngako-ke kuliphutsa lelikhulu kumbita ngemchamuki," kusho Shongwe aphenhvula Magumeni.

"Kube liphutsa lelikhulu kukhetsa yena ngobe amange ahlale kulenzawo sikhatsi sakhe lesinyenti. Tsine sicale kumbona lapho afundza libanga lelishumi nambili nemfundvo yakhe yasenyunivesi," kusho Magumeni.

"Noma kunjalo, ungumntfwana wenzawo lekumele anikwe inhlonipho lemfonele futsi ahole ummango ngaphandle kwekuphikiswa," kusho Shongwe.

"Nitsini ngetinchubomgomo takhe letiphatselene nekwakhiwa kwetindlu, emanti, gezi, ematfuba emisebenti, temasiko nekukhibika, temvelo,

tebulungiswa, temnotfo naletinye?" Kubuta Magumeni.
"Tinchubomgomo akusito temuntfu, kepha tahulumende. Yena sisebenti sebantfu labasikhetsile kutsi sibahole futsi sibasebentele ngendlela lefanele," kuphendvula Shongwe. Amange aphelelwe ngemandla, wachubeka nekuveta imibono yakhe leyenta kutsi angahambisani nenchubo yaMphikeleli.

- 10.1.1 Phawula ngeludvweshu lolutfolakala emkhatsini waMphikeleli naMagumeni uma uva lenkhulumo lekuletheksthi. (2)
- 10.1.2 Shongwe ungumfundisi aphindze futsi atibandzakanye kutepolitiki. Wena ukubona kukuhle yini loko? Sekela. (2)
- 10.1.3 Kubaluleke ngani kutsi ummango utikhetsele umholi lebamtsandzako? Bhekisa kulekuletheksthi lengenhla. (2)
- 10.1.4 Ucinisile yini Magumeni nakatsi Mphikeleli ungumchamuki? Usho ngani? (2)
- 10.1.5 Humusha lenkhulumo yaShongwe letsi "Tinchubomgomo akusito temuntfu kepha tahulumende". (2)
- 10.1.6 Tehlakalo umbhali lakhuluma ngato kulenzaba tiyahambelana yini nendzawo. Sekela ngemaphuzu lamabili. (2)
- 10.1.7 Hlatiya kusonjululwa kwenkinga kulenovelu ngemaphuzu lamatsafu. (3)

NA

- 10.2 Fundza futsi letheksthi leyincenye yenzaba bese uphendvula imibuto letawulandzela:

"Kufa kuyintfo lehlonishwa kakhulu ngesintfu. Emaswati akabuke emuva lapho konakele khona alungise kuphindze kuhlonishwe kufa. Bantfwana bebangavunyelwa kubuka sidvumbu futsi bangayi nasemingcwabeni. Bantfu labadzala kufanele batiphatsa kahle emmangweni bahloniphe nemuti lapho kwehle khona lifu lelimnyama. Akungayi ngekutsi inkholo yemuntfu itsini, kepha akahloniphe sive. Bantfu labete kutewungcwaba bayekele kucoca tindzaba emathuneni, basingatse futsi bevelane nalaba labahluphekile. Kumele kufa kungafaniswa nemtsimba noma nelidzili lelitsite esiveni lapho bantfu betele kwaselitfunjini khona bembatse nangendlela lehlukile," kusho Shongwe. "Ngumsebenti wetfu kulungisa simo lesisibona kutsi senta ummango unhlanhlatse. Imigomo yekutiphatsa kwebantfu emakhaya, emingcwabeni, emihlanganweni emadzilini, etinkantolo. Emphakatsi nakuletinye tindzawo kumele kukhunjutwane ngayo."

- 10.2.1 Catsanisa inchubo yemingcwabo yakadzeni nemingcwabo yanyalo. (2)
- 10.2.2 Ngabe uyavumelana yini nekujikiswa kwebantfu labafuna kufundza esikolweni sasemini. Sekela. (2)

- 10.2.3 Nguliphi lichaza lelingabanjwa ngummango kute kube khona kuzitsa emingcwabeni? (2)
- 10.2.4 Shano ingcikitsi yaletheksthi lengenhla. (2)
- 10.2.5 Humusha inkhulumo yaNyoni letsi "Kufa yintfo lehlonishwa kakhulu ngesintfu". (2)

[25]

SAMBA SIGABA B: 25**NOBE****SIGABA C: UMDLALO**

Kulesigaba kunemidlalo lemibili. Wena-ke khetsa ube munye lowufundze ekilasini lonyaka uphendvule ngawo.

CAPHELA

Khetsa emkhatsini WENDZABAMBHALO NEMIBUTO LEMIFISHA kulowo nalowo mdlalo lowufundzile. Kumele uphendvule nobe ngumuphi umbuto ube MUNYE *ngalowo mdlalo*. Uma ukhetse kuphendvula umbuto wenzabambhalo enovelini, uphokelelekile kutsi kulesigaba uphendvule imibuto lemifisha. Uma ukhetse kuphendvula imibuto lemifisha enovelini, uphokelelekile kutsi kulesigaba uphendvule umbuto wenzabambhalo.

UMBUTO 11**KWAHLWA EMINI – JJ Thwala**

Chaza kuhambelana kwalabalingisi labalandzelako nengcikitsi yalomdlalo, Kwahlwa Emini:

- Mkhalelwa
- Makhosi
- Nkhanise

Indzabambhalo ayibe nemagama langabi ngaphasi kwema-340 kodvwa angabi ngetulu kwalangema-390.

[25]

NOBE**UMBUTO 12****KWAHLWA EMINI – JJ Thwala**

Fundza letheksthi lelandzelako bese uphendvula imibuto letawulandzela:

SIFISO:	Sifiso sami uyasati Makhosi. Loku lokwentiwa boNkhanise, Sicongo, Ndzabeni naNgedze kwedzelela. Bacondze kuphikisana nesincumo senkhosi. Kuyabonakala kutsi nome imitamoyabo ingehluleka, batawuchubeka nekufuna sikhundla sebukhosi. Nabehluleka lapo batakwehlukana siveekhatsi, kubekhona lababuswa nguwe nalababuswa nguNkhanise. Uma sehluleka kuphuma nesincumo sinye nyalo, siya kulamakhata.
---------	--

MAKHOSI:	Asingatsatsi ngemawala. Bindza sengatsi ufile. Akwendlule uMgcibelo lesibuke wona, bese sitsatsa tinyatselo letimatima.
SIFISO:	Sengatsi sitsatsa kancane Makhosi. Labantfu bagucuke uMgwenya; tsine singuMgwenyana. Bahlela tintfo tabo bubindze. Batfukuse indvuku emcubeni. Nasingahlali emehlo nyalo, batasikhuba siwe.
MAKHOSI:	Yekela kwetfuka Sifiso. Ayikho intfo lengentiwa ngulabantfu kitsi. Nome bangahlangana busuku nemini, angeke bente lufu. Batawugcina ngekwenta libandla leMfelandzawonye, kodvwa bangaphumeleli kulwa natsi basehlule. Abasati kahle labantfu: 'Siyimicansa lengagitjelwa mbongolo! Timamba letingaphutfunyelwa!'
SIFISO:	Siyakhuluma Makhosi, kodvwa asivani. Njengoba sekusele emalanga lamabili kutsi ubekwe ebukhosini, kumele kube khona lesikwentako kulamadvodza angaze akwente kitsi loko.
MAKHOSI:	Yehlisa umoya Sifiso. Ngiyakubona uyashisa, kodvwa phola.
SIFISO:	Ngiphole njani Makhosi ngisha? Ngisekhatsi elangabini lesikhotsa.
MAKHOSI:	Nome ungabaselangabini lesibalule, phola.
SIFISO:	Nje uyayibona yini lengoti lesibukene nayo Makhosi? Wena ulusungulo. Mine ngisibambo selusungulo. Kwephuka kwelusungulo kusho kungasasebenti kwesibambo. Kwephuka kwesibambo kusho kungasasebenti kahle kwelusungulo. Asisukume!

- 12.1 Ngabe lamavi aSifiso latsi balengela engotini angemaciniso nobe angumbono yini? Sekela tiphakamiso takho. (2)
- 12.2 Tinkhulumo taSifiso tikhombisa kutsi ungumdlali lotfutfukako. Sekela nobe uphikise lombono ubhekise kuletheksthi lengenhla. (3)
- 12.3 Ngabe indlela Makhosi laphendvula ngayo Sifiso, timveta angumlingisi lonjani? Chaza. (2)
- 12.4 Kulwa kwemacembu etindzaweni lesiphila kuto lomuhla kuhambisana kangakanani naloku lokwenteka kulomdlalo? Hlahlela. (3)
- 12.5 Leligama lelitsi uMfelandzawonye linabuphi budlelwano naloku lokwenteka kulomdlalo? Humusha. (2)
- 12.6 Letheksthi lengenhla ilubhebhethsekisa njani ludvweshu lwalenzaba? Chaza ngemaphuzu lamabili. (2)
- 12.7 Nasibuka siphetfo salomdlalo ngabe umbhali uphumelele kangakanani kusivetela umdlali lomcoka. Chaza? (2)

- 12.8 Ngabe lesicashunwa singadlaleka yini enkhundleni. Sekela imphendvulo yakho ngemaphuzu lambili. (2)
- 12.9 Phawula ngekusetjentiswa kwelulwimi kuletheksthi ubhekise kulamagama aMakhosi latsi:
'Asingatsatsi ngemawala. Bindza sengatsi ufile. Akwendlule uMgcibelo lesibuke wona, bese sitsatsa tinyatselo letimatima.' (3)
- 12.10 Emavi aMakhosi latsi "Nobe ungaba selangabini lesibabuli, phola" aletsani emcondvweni waSifiso? (2)
- 12.11 Kulesicashunwa lesingenhla Sifiso ubonakala angumuntfu lolekelela Makhosi. Ngabe yini lena lafuna kuyizuza? (2)

[25]

NOBE**UMBUTO 13****UMVUZO – NS Nzima**

Lomdlalo uyabonakala kutsi uhamba nekuntjintja kwesikhatsi etimphilweni tebantfu, ikakhulukati kutemfundvo. Bhala indzabambhalo lefakazela lombono ubhekise kulokwenteka kulomdlalo.

Indzabambhalo ayibe nemagama langabi ngaphasi kwema-340 kodvwa angabi ngetulu kwalangema-390.

[25]

NOBE**UMBUTO 14****UMVUZO – NS Nzima**

Fundza letheksthi lelandzelako bese uphendvula imibuto letawulandzela:

SHABALALA:	Thishela lilunga lemmango njengabo bonkhe labanye bantfu. Thishela ngubabe, ngumfundisi, ngumeluleki, ngumholi nemuntfu lowenta leminyenti imisebenti. Umsebenti wathishela akusiko kufundzisa ekilasini kuphela, kepha ungumtali njengalabanye batali, ungumshumayeli njengalabanye bashumayeli. Ulilunga lelisibonelo lesihle emmangweni.
BATJELE:	Mine benginemcondvo munye wekutsi umsebenti wathishela kufundzisa bafundzi nje kuphela.
SHABALALA:	Lamuhla seniyati-ke nonkhe kutsi thishela sibane selive ngobe ungumuntfu lowenta imisebenti leminyenti emmangweni. Lapho kungekho kuvana khona uba ngumchumanisi nemcatululi wetinkinga.
SATILE:	Umbuto wami utsi kubaluleke ngani kwati ngelusendvo lwemakhosi esive seMaswati?

- 14.1 Bhala kunye locabanga kutsi kungafundziswa nguthishela njengemtali. (1)
- 14.2 Batjele ngabe ngumlingisi losicaba nobe loyindilinga yini, uma ulandzela imphilo yakhe kulomdlalo? Sekela. (2)
- 14.3 Bhala sigameko lesicuketse sicakacaka lapha kulomdlalo. (2)
- 14.4 Emimangweni lesiphila kuyo kukuphi lapho thishela asebenta njengemlamuli? Nika KUBILI. (2)
- 14.5 Kubalulekile kutsi badlali nengcikitsi kubumbane. Phawula ngalombono. (2)
- 14.6 Bhala timphawu letimbili letilindzelwe kuthishela wemmango. (2)
- 14.7 Likhono lekuhlela imibuto nekunikana ematfuba etingcocweni walitfutukisa kanjani Batjele? Hlatiya. (2)
- 14.8 Yini inhloso yembhali ngekuveta Shabalala akhuluma ngalendlela lakhuluma ngayo nalabafundzi? (2)
- 14.9 Batjele ulilandzele kangakanani ligama lakhe? Chaza. (2)
- 14.10 Ngabe imphendvulo yaShabalala embutweni waSatile iyatakha yini tetsamelilwati talomdlalo? Chaza. (2)
- 14.11 Phawula ngalelisiko lekukhishwa kwemiphumela yebafundzi belibanga lelishumi nambili ephephandzabeni. (2)
- 14.12 "Liphikankhani lifela enkhanini." Humusha lesaga ubhekise kuSatile. (2)
- 14.13 Ngabe ligama lalomdlalo libumbene kangakanani nesiphetfo sawo? Phawula. (2)

[25]**SAMBA SIGABA C: 25****SAMBA: 80**